

RAMMELSCHAU 1931

Scheenhaitskeenigin isch Mode
Und sogar uf Schwizerbode,
Wie simmetaler Kieh und Schtiere
Wott me jetz au e Mentsch prämiere.

Der Schwizerclub in Ziri wott,
Ass some Geschäft in's Bauer sott,
Doch d'Schwyzere sait: Du kasch mer jo
Mit fidleblutt goh ahneschtoh.

E Glepfer anere Mozartfiir,
Das macht s'Banggett e bizzli z'tiir,
Drum git's nur no Salad und Thee
Italiänische jo persee.

Der Capitol zieht wie veruggt?
Siddäm si hänn in'd Zytig druggt,
Es sig nyt Neys im Weschte gscheh,
Doch kenn mer's Altj nomol seh.

D'Kanalbank z'glai, e-n-alti Mugg
Me sott si stregge gege d'Brugg,
Doch s'Baudepartemänt muess lache:
„Wo sott me denn der Brunne mache?“

E neyi Mode isch in Sicht,
Laubflägge trag me-n-au im Gesicht,
Das git Verdienscht fir d'Schwyzerkieh
Me ka der Schtöff bim Bar bezieh.

Der A Ce und der Migrofau
Die schriebe hit ins Blettli au,
Was uns bis morn, wenn fusioniert
Im glische Hafe wird serviert.

S'Bändelwurm-Museum kunnt
Us eme dunggle Luftmattgrund
Jetz uff Bettige plaziert,
Ass der Autobus ränfiert.

D'Dalblemer importiere jetz
Trotz em Arbeitslosegsetz
Negerschtämm zuem Musig mache
Und zue andere schwarze Sache.

Wo der Zeppeli isch ko halte
Het me s'Wätter duss abg'halte.
Nassi Fiess het's gäh. Das hassi!
S'haige viel no hitte nassi.

Woba, Muba, Saffa, Zika
Alli wänn e-n-Abkirzig ha
Si halte mit der Neyzyt Schritt
Nur d'Frauen-Union-Ziri nit.

Im griene Wald bim Eglisee
Do turne d'Lyt im Neglischee.
Im Kingelistall muesch s'Dach abdegge,
Wotsch d'Flosse-n-usenander schtregge.

E-n Affefelse het biko
Dur Schielerschpändi unsere Zoo.
E Felse z'schaffe wär bald Zyt,
Im Rhy, fir die vom Kunschkredit.

Kemmet alli am Sunntig-Zobe no der Fasnacht
in Musigsaal zuem grosse Schlussobe vo de
Comité-Schnitzelbängg.